



04 APR, 2025

85 rumah diisytihar selamat, mangsa dibenarkan pulang

Sinar Harian, Malaysia



85 rumah diisytihar selamat, mangsa dibenarkan pulang

SHAH ALAM - Sebanyak 85 rumah yang terlibat dalam kebakaran saluran gas di Putra Heights, Subang Jaya telah disahkan selamat dan penghuni dibenarkan pulang ke rumah masing-masing mulai malam Khamis.

Menteri Besar Selangor, Datuk Seri Amirudin Shari berkata, Jabatan Bomba dan Penyelamat Malaysia (JBPM) serta penyedia utiliti seperti Tenaga Nasional Berhad (TNB) telah mengesahkan perkara itu melibatkan kawasan di Taman Harmoni dan bekalan air serta elektrik telah disambungkan ke rumah terbabit.

“Pihak Pengerusi

Jawatankuasa Bencana Daerah akan memaklumkan kepada setiap pemilik ini dan mereka diberi peluang untuk pulang ke kediaman masing-masing mulai hari ini (Khamis).

“Dari masa ke masa kita akan lihat balik kerana setakat ini ada lebih kurang 85 rumah yang telah dianggap ataupun diisytihar selamat oleh JBPM,” katanya.

Terdahulu, Pegawai Daerah Petaling, Huzunul Khaidil Mohammed dilaporkan berkata, 115 pemilik kediaman yang terjejas dibenarkan masuk ke rumah mereka secara berfasa bermula Khamis bagi tujuan pemeriksaan.